

A apela e sentencia

Aruba Bank ta hiba Otmar Oduber di BCY Entertainment Corte Superior

ORANJESTAD (AAN): E caso cu Otmar Oduber di BCY Entertainment a gana contra Aruba Bank pa a nenga di habri cuenta bancario pa señor Otmar Oduber, no a caba. DIARIO a haya confirmacion cu Aruba Bank a apela e sentencia di Hues di Corte den Promer Instancia.

Manera DIARIO a publica, Hues den su sentencia di dia 3 Januari 2021, ta muestra cu banconan na Aruba, entre nan Aruba Bank, tin un funcion importante pa cu comercio na Aruba pa asina companianan por haci uso di mercado local y internacional. Esey ta nifica cu un compania ta haci uso di un cuenta bancario. Esaki tambe ta conta pa BCY Entertainment (BCY). For di e reglanan di banco relaciona cu e ley contra labamento di placa, por compronde cu ta investiga un compania cu kier



habri un cuenta bancario. Aruba Bank a bisa cu e tin e libertad di no habri un cuenta bancario pa BCY. Hues ta muestra cu en principio esey ta corecto, semper si Aruba Bank tin motibonan di peso obetivo y hustifica. Hues ta muestra cu Aruba Bank ta muestra cu door di e miedo cu e banco lo por haya mal reputacion door cu Oduber ta sospechoso den un investigacion penal andando relaciona cu supuesto fraude y corrup-

cion durante su periodo di minister, a dicidi cu no ta habri un cuenta bancario pa BCY. Na opinion di Hues, esaki no ta motibo di peso hustifica pa nenga di habri un cuenta pa BCY. Hues a muestra cu den e estado di derecho di Aruba, te ainda ta conta, cu un persona ta inocente tanten cu den Corte e sospechoso no a wordo condena. E sospechoso Oduber durante tratamiento di e caso a desmenti di tin algo di haci pa loke e

ta wordo sospecha di dje.

Hues ta ordena Aruba Bank N.V., pa tanten cu den un caso mas profundo no tin un otro decision, dentro di 24 ora habri un cuenta bancario pa BCY y mantene esaki habri bao di e condicionnan normal. Esaki bou di e comprendimento cu si Oduber, wordo condena door di un Hues den un caso penal pa loke e ta wordo sospecha di dje, Aruba Bank N.V. tin e autoridad pa caba cu e relacion cu BCY, teniendo cuenta cu un periodo di 2 luna.

ARUBA BANK A APELA

Ta asina cu den un caso di Corte den Promer Instancia, cada partido tin e oportunidad di apela e sentencia. Normal ta duna un periodo di 2 siman pa un partido apela. DIARIO a papia cu e abogado cu a representa

Aruba Bank, mr. Croes Fernandez Pedra. A puntra mr. Croes Fernandez Pedra, si Aruba Bank a dicidi di apela e sentencia.

E abogado a duna di conoce cu Aruba Bank a apela e sentencia. Esey ta nifica cu awor e caso ta bay Corte Superior, caminda 3 Hues cu ta forma Hof ta bay trata e caso completamente di nobo.

Manera e sentencia di Hues di Corte den Promer Instancia ta bisa, Aruba Bank N.V., mester habri e cuenta bancario pa BCY Entertainment y mantene esaki habri tanten cu den un caso mas profundo no tin un otro decision.

Dentro di algun siman posiblemente lo bira conoci ki dia tratamento di e caso aki lo tuma lugar. Mirando e situacion di Covid, Hof no ta viaha bin Aruba pa tratamento di apelacion sino cu ta haci esaki via video conference.